

CASO CRUEL: MUCHA MUHER DI 7 AÑA VIOLA SEXUALMENTE PA DOS AÑA LARGO

ORANJESTAD (AAN): Cada caso di violacion sexual ta uno dimas y DIARIO semper a combati tipo di actonan asina y semper a trata y lo sigui trata di evita cu casonan asina por tuma lugar door di informa, adverti y concientiza e pueblo debidamente.

Pa algun dia caba DIARIO tabata na altura di e caso tristo di violacion sexual di un criatura di 7 aña, pero pa evita cu autoridadnan no worde stroba den nan investigacion, DIARIO no a trece e noticia aki den publicacion.

Awor cu autoridadnan ta den un fase avanza cu e investigacion, e pueblo di Aruba mester haya sa ki sorto di actonan inhumano y te hasta por worde bisa diabolico ta tumando lugar na Aruba cu criaturanan inocente.

Mama di dos mucha, un yiu muher y un yiu hombre a duna DIARIO informacion amplio di loke su yiuonan mester a pasa aden pa dos aña largo.

Dos aña pasa e mama cu a haya su mes den problemanan familiar y financiero, mester a tuma e decision pa laga su yiuonan bay Casa Cuna pa evita cu e muchanan worde perhudica door di circunstancianan di bida cu por pasa cu cualkier famia.

Na Casa Cuna e yiu muher cu e tempo ey tabata tin 5 aña a cuminsa worde viola door di un otro mucha hombre, cu tambe tabata keda den Casa Cuna, segun e mama.

Un dado momento e muchanan a yega na un edad cu nan mester a bay Imelda Hof.

E actonan di violacion sexual a cuminsa den Casa Cuna y e mama cu tabata tin e impresion cu esaki tabata tuma lugar, a hala atencion di gerencia di Casa Cuna pero gerencia aparentemente no a wak e gravedad di e caso o nan no a pone atencion debido na e caso, pero ta investigacion policial mester bay saca afor si esaki ta berdad o no.

Segun e mama, e mucha hombre cu tabata viola su yiu muher na Casa Cuna tabata tin familiar cu tabata keda na Imelda Hof y e dosnan aki tabata tin de bes en cuando contacto cu otro y aparentemente asina e informacion a worde pasa pa otro, pa e yiu muher por a sigui bira victima di violacion sexual.

Segun e mama na Imelda Hof, e yiu muher tabata worde viola door di un mucha hombre di 14 aña kende tabata saca e pover criatura anochi di su camber, pa asina viola e mucha brutalmente pa despues hiba e mucha bek pa su camber.

Durante dia tambe otro

muchanan tabata viola e yiu muher na school y esaki ta algo horroroso pa haya di tende, cu muchanan por worde viola durante oranan din school sin cu maestro y maestranan por a nota algo.

Ta trata aki di un caso di violacion sexual di un criatura di apenas 5 aña cu mester a pasa den un experiencia traumatico pa dos aña largo.

E ruman hombre di e mucha muher tabata bringa cu tur e mucha hombernan cu tabata trata di viola su ruman muher y ta masha hopi golpi e ruman hombre mester a wanta, pa asina cada biaha trata di scapa su ruman muher, pero asina mes ta casi tur dia e ruman muher tabata worde viola.

Ta mas cu un mucha hombre a abusa di e mucha muher aki y ta straño y casi incomprendible cu un ruman hombre chiquito di e mucha muher mes por a nota loke tabata pasando y personal di school y Imelda Hof no a nota nada?

Segun e mama na varios ocasion e tabata hala atencion di staff di Imelda Hof, pasobra e tabata tin sospecho cu algo

malo tabata pasando cu su yiu pero ta cada biaha personal di Imelda Hof tabata laga hopi di desea y no a drenta den accion, pa asina defende e mucha muher o pa saca afor kico tabata pasando.

E yiu muher tabata haya infeccion na su curpa abao cada biaha y ora cu e yiuonan tabata keda na cas di e mama durante vakantie, e yiu muher no tabata tin e problema aki pero ta cada biaha cu nan mester a bay bek pa Imelda Hof e mucha muher tabata bolbe bin cas cu infeccion.

Na varios ocasion e mama a roga Imelda Hof pa e por haya su yiuonan bek, pasobra e tabata teme pa cu e seguridad di su yiuonan pero e no por a haya su yiuonan bek.

Diasabra ultimo ora cu e muchanan tabata na cas, e mama por a haya su yiu muher cu tabata completamente traumatiza, asina leu cu e criatura tur emocional por a bin conta su mama despues di dos aña kico tabata pasa cune.

Dialuna siman pasa tabata e ultimo biaha cu nan a viola e criatura aki y Diasabra mainta

8'or, despues cu e yiu muher a pasa den un anochi largo di pesadida debi na tur su experiencia traumatico cu el a pasa aden pa dos aña largo, e mucha no por a wanta mas y a bin conta loke a pasa.

Ora cu e mama cu un dolor inmenso den su curazon a haya sa loke su dos yiuonan mester a pasa aden, su mundo casi a yega na un final pero cu hopi forza pa bringa pa su yiuonan, el a dicidi di bay haci mesora denuncia na Polis.

Ora cu nan a bin busca e muchanan pa hiba nan pa Imelda Hof, e mama a para riba cu e no ta laga su yiuonan bay hamas y nunca pa Imelda Hof y segun e mama, straño ta cu personal di Imelda Hof no a reacciona mes riba e decision di e mama.

Con ta bay para cu e muchanan aki cu mester a pasa den un fiero pa dos aña largo?

E daño cu a worde haci lo bay tin su efectonan riba e criaturanan aki pa resto di nan bida y si e muchanan aki no haya e ayudo y cuidio apropiado, e daño por bira peor y esaki ta algo cu henter e comunidad di

Aruba mester percura pa no pasa.

E mama tambe mester carga e peso di amargura aki pa resto di su bida y sigur si mester realiza cu esnan cu e comete nan actonan diabolico ta menornan di edad, pa cual no tin Ley na Aruba pa por castiga nan debidamente.

Den e caso aki ta adultonan cu mester a cuida e muchanan ta mas culpabel cu tur otro hende y e caso aki lo bay haya un rabo formal.

Cualquier persona cu por haya lo minimo impresion cu un mucha ta worde viola o intento ta worde haci pa viola un mucha o kende cu ta, mester move cielo y tera pa evita cu algo asina por tuma lugar y e comunidad di Aruba y tur instancianan cu ta traha cu mucha, mester cuminsa realiza esaki anto cu rapidez di urgencia nacional.

Hesus a bisa: "Laga e muchanan bin cerca Mi" y cu e palabranan aki Hesus a duna di conoce cu mester proteha muchanan pasobra nan ta inocente.

